

O Le Malaga Faaiu, Tuuatoatasi a le Faaola

Saunia e Chakell Wardleigh
Mekasini a le Ekalesia

Lona soifuaga atoa i le olaga nei, sa tele malaga sa faia e le Faaola—O Lana malaga mai Peteleema agai atu i Aikupito a o tama-meamea, o Lana malaga e 40-aso i le vao, o Ana mau malaga i aai, ma faoa aai, ma fale e aoao atu ai, faamalolo, ma faamanuia i le taimi o Lana auaunaga, ma le tele o isi mea. Ae e i ai le malaga e tasi na tatau i le Faaola ona ia faia na o Ia, ma o se malaga sa na o Ia e mafai ona onosaia.

ECCE HOMO, SAUNIA E LOUIS ROYER, RIJSMUSEUM

“I le Aso Sa o le Eseta tatou te faamanatu ai le mea aupito loa—ona tatalia ma le mamalu na tupu i le talafaasolopito o le lalolagi.”

“O le aso na suia ai mea uma.

“O lena aso na suia ai lo’u olaga.

“Na suia ai lou olaga.

“Na suia ai le taunuuga o fanau uma a le Atua.”

Peresitene Dieter F. Uchtdorf, Fesoasoani Lua i le Au Peresitene Sili, “O Le Meaalofa o le Alofa Tunoa,” *Liahona*, Me 2015, 108.



Simon Dewey

LO’U TAMA’E, SAUNIA E SIMON DEWEY

Puapuagatia e le Mafaatusalia

“E leai se tagata ola e mafai ona tāēa le taua atoatoa o le mea na faia e Keriso i Ketesemane.”

“Ua tatou iloa sa puna mai le afutoto i puninii uma o Lona tino a o Ia inuina ‘alu o lena ipu oona na tuuina atu e Lona Tama ia te Ia.”

“Ua tatou iloa sa puapuagatia o Ia, i le tino ma le agaga, e sili atu nai lo mea e mafai ona tigaina ai le tagata, sei vagana ai e oo i le oti.”

“Ua tatou iloa i se isi itu, e le mafai ona tatou malamalama i ai, o Ona puapuaga na faamalieina ai manaoga o le faamasinoga tonu, faasaolotoina ai tagata salamo mai tiga ma faasalaga o le agasala, ma mafai ai ona maua le alofa mutimutivale e i latou o e talitonu i Lona suafa paia.”

“Ua tatou iloa sa faō o Ia i luga o le eleele ona o tiga ma mafatiaga o se avega e le mafuatia lea na mafua ai ona gatete o Ia ma na toetoe a le mafai ona Ia inuina le ipu oona.”

Elder Bruce R. McConkie (1915–85) o le Korama a Aposetolo e Toasefululua, “O le Mana Faamamaina o Ketesemane,” *Ensign*, Me 1985, 9.

Faaogaaga e le Tagata Lava Ia: E ui atonu tatou te le iloaina i taimi uma, ae na mafatia le Faaola i soo se ituaiga o tiga i le taimi o le Togiola. Ua malamalama o Ia i tiga faaletino uma, mai se ponaivi ua gau i le ma’i ogaoga aupito matuia. Sa Ia lagonaina le pogisa ma le leai o se faamoemoe o ma’i faalemafaufau e pei o le lotofati, atuatuvaile, o mea ua fai ma vaisu, tuulafoaiina, ma le faanoanoa. Ma sa Ia lagonaina manu’aga uma faaleagaga aua sa Ia tauaveina i ona Lava luga agasala uma a tagata.

Na aoao mai Elder David A. Bednar o le Korama a Aposetolo e Toasefululua, “I se taimi o le vaivai atonu tatou te alalaga, ‘E leai se tasi na te iloa pe faapei. E leai se tasi e malamalama i ai.’ Ae e silafia lelei ma malamalama foi i ai le Alo o le Atua, aua sa Ia lagonaina ma tauaveina a tatou avega mamafa taitasi” (“Tauave ma le Faigofie a Latou Avega,” *Liahona*, Me 2014, 90).